

BAB III

METODOLOGI KAJIAN

3.1 Pendahuluan

Tujuan utama kajian ini dijalankan untuk mendapatkan maklumat tentang tahap kemahiran membaca murid tingkatan dua terhadap bahan-bahan bacaan yang dipemerangkatkan mengikut bentuk-bentuk soalan pemahaman aneka pilihan, mengisi tempat kosong, melengkapkan ayat dan mengeja perkataan Jawi. Kajian ini dilaksanakan melalui:

1. Pemilihan murid sebagai sampel.
2. Pemilihan bahan yang digunakan untuk mendapatkan data.
3. Pengumpulan data.

3.2 Sampel Kajian

Kajian ini melibatkan murid-murid tingkatan dua di sebuah sekolah

menengah di Wilayah Persekutuan. Sekolah ini terletak kira-kira sepuluh kilometer dari Bandar Raya Kuala Lumpur. Murid-murid yang dipilih sebagai sampel datangnya dari latar belakang sosiekonomi rendah sehinggalah sosioekonomi menengah atas. Murid-murid terdiri daripada pelajar Melayu yang mempunyai pengetahuan yang terhad tentang Bahasa Arab dan tulisan Jawi. Sampel kajian terdiri daripada 30 orang pelajar perempuan dan 50 orang pelajar lelaki.

3.3 Bahan Kajian

Kajian ini dijalankan dengan menggunakan:

- a) Teks kefahaman dalam tulisan Jawi dan diikuti oleh soalan-soalan pemahaman jenis aneka pilihan juga dalam tulisan Jawi.
- b) Mengisi tempat kosong dengan perkataan-perkataan yang sesuai.
- c) Melengkapkan ayat.
- d) Menukarkan ejaan Rumi kepada ejaan Jawi.
- e) Menukarkan ejaan Jawi kepada ejaan Rumi.

3.4 Kaedah Pengumpulan Data

Pengkaji telah mengumpulkan 80 orang murid Tingkatan Dua dalam sebuah dewan dengan bantuan tiga orang guru di sekolah tempat kajian ini dijalankan. Murid-murid diberikan Petikan karangan pendek (iaitu teks yang sesuai untuk murid tingkatan dua) meminta mereka membaca senyap selama 15 minit dan kemudian menjawab soalan kefahaman selama 15 minit. Kemudian diikuti oleh soalan yang kedua berupa mengisi tempat kosong dengan perkataan yang telah diberi dengan prosedur yang sama. Selepas menjawab selama 30 minit, murid berhenti rehat selama 10 minit. Kemudian diikuti dengan soalan ketiga iaitu melengkapkan ayat, soalan keempat menukar ejaan perkataan Rumi kepada Jawi dan soalan kelima menukar ejaan perkataan dari Jawi ke Rumi dengan prosedur yang sama.